

nid yn unig y tu fewn i furiau'r ysgol  
ond i'r pentref a'r ardal gyfan, wastad  
yn barod i helpu bob achos a  
gweithgaredd. Cafwyd

cydweithrediad hapus rhyngddo â'i  
gydweithwyr gan greu naws gartrefol  
yn yr ysgol. Difyr a diddorol yw  
atgofion pawb fu'n ymwneud ag ef yn  
ystod ei gyfnod yn y Penrhyn - yr holl  
straeon, y tynnu coes, y digwyddiadau  
a'r troeon trwstan fu'n rhan annatod o  
fywyd yr ysgol mewn cyfnod o  
newidiadau aruthrol o fewn y byd  
addysg. Ond "er gwaethaf pawb a  
phopeth" daliodd Alun i wenu gan  
gymryd popeth fel y deuai a rhoi pob  
cyfle posibl i'r plant brofi ystod eang o  
weithgareddau.

Ei brif ddiddordebau oedd chwaraeon  
a cherddoriaeth. Roedd ei  
frwdfrydedd ar y maes chwarae yn  
heintus ac yn amlach na pheidio  
byddai'n ymlâdd yn llwyr wrth geisio  
cael y gorau allan o'r plant, boed  
mewn gêm bêl-droed, parti dawnsio  
gwerin neu gôr.

Ar drothwy ei ymddeoliad dymunwn  
iechyd iddo i fwynhau seibiant  
haeddiannol yng nghwmni ei deulu  
wedi cyfnod hir o ddysgu. Bellach  
bydd ganddo ddigon o amser i baratoi  
ei hoff bryd bwyd - cinio dydd Sul,  
gwrando ar gerddoriaeth glasurol a  
chanu corawl, perffeithio ei ddawn fel  
unawdydd lleisiol neu chwarae golff.  
Ond yr uchelgais fawr mae'n debyg  
fydd gwireddu ei syniad ef o  
"nefoedd" - sef arwain Côr Pen-dam i  
fuddugoliaeth yn y Genedlaethol!!!

Pob hwyl a bendith i'r dyfodol.

E.E.